

2017-imut Ilassutissatut aningaasaliissutitut inatsisissatut siunnersuut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinninneq

Matumuuna Naalakkersuisut Aningaasaqarnermut Akileraartarnermullu Ataatsimiititaliaq 2017-imut ilassutitut aningaasaliissutitut inatsisissatut siunnersuummut isumaliutissiissutaanik qujassuteqarfigissavaat.

Aningaasaqarnermut Akileraartarnermullu Ataatsimiititaliaq isumaliutissiissummini aningaasaliarnermi periutsinik pingaarutilinnik arlalinnik paasissutissiivoq, Inatsisartullu taamaaliornikkut pisortat allaffissorneranni aningaasaqarnikkut aqutsinermik pitsaasumik ingerlatsiinnarnissamik pisariaqartitsinermik erseqqissaateqarnerat, Naalakkersuisut nuannaarutigaat. Naalakkersuisut tamanna isumaqatigilluinnarpaat.

Naalakkersuisut aningaasaliissutinik nuussineranni inatsisitigut tunngavissarititaasunik naammassinninnerannik Aningaasaqarnermut Akileraartarnermullu Ataatsimiititaliap naliliinera Naalakkersuisut ilanngullugu iluarisimaarpaat.

2017-imi missingersuutinik malittarinninnerup ataasiinnaap ataatsimiititaliamut nassiunneqarsimanera, taassumalu Inatsisartunut kingusissukkut aatsaat nassiunneqarsimanera Ataatsimiititaliap isornartuutippaa. Tassunga atatillugu Naalakkersuisut aamma juni 2017-imi missingersuutinik malittarinninnermik akuerissuteqarnerat oqaatigineqassaaq. Taannali kingorna taamaallaat Naalakkersuisut nittartakkakkut qupperneranni, missingersuutinik malittarinninnerit ingerlaavartumik tamanut saqqummiunneqartarfiatigut tamanut saqqummiunneqarpoq. Malitseqartitsinerit taakku nassiunneqartarnissaannik ataatsimiititaliaq kissaateqartoq Naalakkersuisut maluginiarpaat, taamaammallu tamanna tulluarsaavigissallugu.

Tamatumunngali tapiliullugu aningaasaliissutitut tamarmiusunut missingersuutinik malittarinninnermik suliat ingerlasarnerat taakkulu imaat pillugit suliaqartoqarnera erseqqissaatigineqassaaq. Taamaaliornikkut namminersorlutik oqartussat aningaasaqarnerata qanoq ineriartornera pillugu Inatsisartut nutaanerpaanik paasissutissinneqarnissaata qulakkeernissaa anguniarneqarpoq. Taamaalilluni malittarinninnerit Inatsisartunut sakkussaalluarnarnerulissapput, tassani ilassutitut aningaasaliissutinik aningaasanullu inatsisissatut siunnersuutinik suliarinninnerni aamma. Tamanna 2019 aallarnerfigalugu missingersuutinik malittarinninnerni atuutilersinneqassasoq naatsorsuutigineqarpoq.

Peqqinnissaqarfimmut aningaasaliissutit sukumiisumik misissoqqissaarnissaat Naalakkersuisunit pingartinneqarluni ingerlanneqassasoq Ataatsimiititaliap kaammattuutigaa, tassani allaffissorneq aningaasanillu aqutsineq ilanngullugit. Tassunga atatillugu paasissutissiissutigineqassaaq suliassaqarfik 2019-mut aningaasanut inatsisissaq pillugu isumaqatiginninniarnernut ilaammat, Ataatsimiititaliallu kaammattuutaa Naalakkersuisut isumaqatiginninniarnernut taakkununga ajunngitsumik tapertaalluassasutut tigussavaat.

Naggataagut inatsisissatut siunnersuutip isumaqatigiilluni tapersorsorneqarnera Naalakkersuisut qujassutigaat.

Taama oqaaseqarlunga inatsisissatut siunnersuut Inatsisartunut suliarineqartussanngortippara.